

Deputadu FRETILIN Konsidera OJE 2020 Orienta Liu ba Despeza Laiha Retornu



Deputadu Bankada FRETILIN, Joaquim dos Santos 'Boraluli'. Imajen Tatoli/Egas Cristóvão

DILI, 11 novembru 2019 (TATOLI) – Deputadu Bankada *Frente Revolucionária Timor-Leste Independente* (FRETILIN), Joaquim dos Santos 'Boraluli', konsidera Proposta Orsamentu Jerál Estadu (OJE) 2020 ho montante biliaun \$1,950 orientadu liu ba despeza ne'ebé laiha rendimentu, liuliu ba kategoria bens no servisu.

Husi totál orsamentu, bainhira fahe tuir kategoria saláriu no vensimentu millaun \$241,271, bens no servisu millaun \$738,428, transferénsia públika millaun \$457,773, kapital menór millaun \$53,267 no kapital dezvoltimentu millaun \$459,260.

“Orsamentu 2020 nian la lori dezvoltimentu no sei lori de'it maka dezastre ekonómiku tanba Governu orienta liu ba despeza sira ne'ebé la lori retornu ekonómiku. Subsídium sira fó ba ema gasta no laiha retornu ekonómiku, signifika la fó prioridade ba dezvoltimentu ekonómiku”, tenik Deputadu Opozisaun ne'e iha resintu Parlamentu Nasionál (PN), segunda ne'e.

Nia halo observaun, alokasaun orsamentu ba kategoria bens no servisu ba tinan 2020 hamutuk ho montante millaun \$703,7, sa'e porsentu 55,4 kompara ho alokasaun orsamentu ba kategoria ida ne'e iha OJE 2019 nian.

Joaquim dehan tan, ezemplu seluk maka partisipasaun Timor-Leste nian iha Expo Dubai ne'ebé sei gasta millaun \$2,1.

“Ba para gasta de'it osan, nune'e mós millaun \$5 iha Dotasaun ba Governu Tomak hodi selu ba kuota nu'udar membru ba instituisaun internasionál hodi asegura partisipasaun Timor-Leste nian iha atividade nível rejionál no internasionál”, nia akresenta.

Tuir Deputadu ne'e, alokasaun orsamentu la lori dezvoltimentu tanba despeza la nesesáriu no boot loos.

“Ha'u ta'uk bele hamosu desviu orsamentu kuandu osan boot hanesan agora, ministériu sira-nia ema balun ne'ebé iha esperiénsia manobra, bele halo desviu orsamentu tanba Governu defisil atu kontrola”, nia subliña.

Deputadu ne'e argumenta, perigozu liu kuandu verba orsamentu agregadu ne'ebé alokasaun orsamentu iha fatin diferente maibé tau hamutuk iha fatin ida, hafoin iha nesesidade maka ba hasai.

“Kuandu iha nesesidade maka hasai ne'e ema bele inventa nesesidade. Política governasaun labele hanesan ne'e, tenke iha definisaun substánsia hafoin iha asaun konkretu maka bele uza osan”, nia esplika.

Parte seluk, Deputadu Bankada *Congresso Nacional Reconstrução de Timor* (CNRT), Domingos de Carvalho, konkorda ho ideia deputadu FRETILIN nian.

“Ne'e klaru, hosi ami Bankada CNRT decide ona katak hakarak ka lakohi tenke halo redusaun. Karik la halo redusaun no sira mantein nafatin maka orsamentu ne'e sei la pasa”, hateten Deputadu Bankada Governu ne'e

Nia rekoñese, haree ba montante orsamentu ne'ebé boot tebes, orsamentu ba tinan oin sei gasta barak liu ba despeza la nesesáriu sira.

Nune'e mós, nia konkorda ho deklarasaun Deputadu FRETILIN ne'ebé maka dehan OJE 2020 sei lori dezastre ekonómiku iha futuru.

Antes ne'e, Ministra Finansa interina, Sara Lobo Brites, esplika katak montante iha Orsamentu 2020 nian, ba kategoria bens no servisu boot ho totál millaun \$738,428 tanba prevee mós atu selu dívida ba kombustível hamutuk millaun \$100-resin.

Governante ne'e rekoñese, kategoria ne'e iha duni aumentu iha porsaun boot liu iha tinan ikus atu selu kombustível iha sentrá elétriha Hera no Betano.

Dívida mosu tanba iha 2017, orsamenta ba kombustível iha sentrá elétriha rua alokasu de'it ba fulan neen, enkuantu iha fatin hanesan tenki selu husi 2017 to'o 2018, maibé iha 2018 mós la konsege selu kompletu to'o agora maka foin prevee fali iha proposta tinan oin.

Sara Lobo justifika, despeza ne'ebé kontribui mós ba kategoria bens no servisu ho montante aas iha 2020 maka servisu seluk ne'ebé Governu hakarak hadi'a hanesan área saúde no área sira seluk tan.

Jornalista: Evaristo Soares Martins Editór: Xisto Freitas